

**DRAMA NIHADA HASANOVIĆA**  
**"PODIGNI VISOKO BAKLJU"**  
**ODLOMAK PRVE SCENE**

*Nesrećne rimske legije, pod vodstvom Publija Kvintilija Vara, grdno nasamari heruščanski poglavica Arminije, navuče duboko u Teutoburšku šumu i potuče do nogu. Koliko se Rimljana izbavilo, na prste se može izbrojati, a sam Var spasio se samoubistvom.*

**LICA**

VAR	rimski vojskovođa
PREFEKT	legionarski karijerista, osobenjaka, "vinograd božiji"
AZIN	rob pod Varovim jarmom; ako je prefekt osobenjaka, on je besmislenjak
ROBINJA	mjesečarka
SANIO	odbjegli legionar
CENTURION	
LEGIONAR PRVI	
LEGIONAR DRUGI	
FRULAŠ	
SPAVAČ	vojnika koji će se onesvijestiti
GLASONOŠE	

## **MJESTO ZBIVANJA:**

Bespuća Germanije. Put koji se gubi u daljini, ravan i kao perspektiva savršen u svojoj usmjerenosti prema beskraju. Na početku je s obje strane obrubljen kolonijama panjeva i posječenih borovih stabala. Neko se, izgleda, našalio donijevši na ovaj prirodni, neobrađeni namještaj jelo i piće u raskošnim posudama. Što dalje put odmiče, šuma je očuvanija, gušća, tamnija.

## **Scena I**

*Među visokim borovima.*

**PREFEKT** (*trlja ruke*): Ovo je izvrsna prilika, jeste, divna prilika, ne ulizujem se ja, dopustite mi - hoćete li? - dopustite mi, silniče visokocijenjeni, da se oslobodim osjećanja koja razaraju moje tkivo, da ogromno poštovanje iskažem prema vašoj ekscelentnoj pojavi! Jer, imam razloga za to! A onda vaš, vaš nepogrešivi njuh!

**CENTURION**: Stojim uz prefektove riječi. Ko je glavni, najbolji je.

**PREFEKT** (*pokazujući na centuriona*): Eto vam ulizice! Prvoklasnog!

**VAR** (*prefektu*): Zašto ti mene toliko u zvijezde ukivaš? (*Mrtva lisica se klata u njegovoj ruci.*)

**PREFEKT**: Zašto? Pa vi ste skromni! Ja znam šta govorim! Laprdaju podoficiri, prefekt ne! Ko od malih nogu zalazi u gajeve - mislim na vas - ko postavlja zamke i uči kojim se otrovom divljač uspavljuje, a

kojim ubija, ko jelenima utjeruje strah u kosti i pesniči se sa medvjedima, taj će koplje, luk i strijelu ponijeti na onaj svijet. Tolika je ljubav prema lovu, čak je ni smrt ne može upropastiti.

CENTURION (*uspalio se*): Jeste! Živa istina!

VAR (*prefektu*): Preuveličavaš! Mrtvac pretvoren u pepeo, šta on može ponijeti? Njega će vjetar raznijeti na četiri strane svijeta i on više neće biti ni hrpa, ni pepeo, ništa neće biti!

PREFEKT: Zaboravljate na duh, on je vatrostalan! On ne umire!

VAR: Ima li duh ruke?

CENTURION (*mozak djeteta*): Ja sam čuo da duh umire.

PREFEKT: Voljni ste poslušati? Htio bih vam razjasniti vaša uzvišena... uzvišenosti.. Uzmimo za primjer lov! Ta čudna opsesija, zabavna koliko i krvava, nije prirodjena svakom, budući da naša boginja nekoliko puta promisli prije negoli odluči koga će učiniti...

VAR: I? Smotao si se?

PREFEKT: Koga će učiniti lovcem! To sam htio reći!

CENTURION: A da se ona druga zvijerka nije probudila, ulov bismo udvostručili! Dvije bismo životinje imali, jednu sa četiri, drugu sa dvije noge! Ho-ho, ho-ho! Alaj bismo se naderali kože i nasjekli udova!

PREFEKT: Ko je tebe vukao za jezik? Ne obraćam se tebi! Šuti, da ne bi kupio zube!

CENTURION (*kao da se izvinjava*): Važno je reći... Lovina zamalo pa dvostruko veća! Zar je u tome nešto loše?

PREFEKT: Je li te neko nešto pitao? Kontriraš? Bi li volio kopati?  
(*Pogledi im se sudaraju. Prefekt se okreće Varu.*)

PREFEKT: Vraćam se na ono što sam... Za lov je potrebno osjećati glad u venama, njen zov, plavu, hladnokrvnu glad koja se pretvori u uho, koja zapaža, istražuje...

VAR: Istini za volju, nisam se baš preznojio... Ti imaš neku zadnju namjeru, skrivenu! Osjećam ja!

PREFEKT: Pun pogodak! Namjera mi je sljedeća: pridobiti u potpunosti vaše povjerenje, platiti nekog prelivodu da vas odstrani i odjenuti se ovim! (*Takne Varov ogrtač.*) Moj cilj!

VAR : A je li?

PREFEKT (*ležernost traži, ali je ne nalazi*): Ama, dajte, kao da je meni stalo do... Šala... Kazaću vam svoje stvarno mišljenje: vi ste suviše skromni kada sudite o sebi ili ste potpuno neskloni samoposmatranju, ali... ne razbijajmo glavu sitnicama.

VAR: Ja, ovaj junak...

CENTURION: Ja!

VAR: ... i njegovi drugovi okružismo lisicu, te je izudarasmo kopljima.

CENTURION: Ovako! Ovako! Tras!

VAR: Kraj priče.

PREFEKT: Potcjenjujete svoju vještinu. Još jedna potvrda vrline.

VAR: Ti... U tebi ima makar kap grčke krvi... Zvučiš mi nekako mudroserski, visokoumno...

PREFEKT: Hvala.

• • •